

Regional News Unit AIR Aizawl
Monday, June 23, 2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Nimin nileng leh nizan thlenga Champhai khawpuia ruahsur nasa tak chuan chhiatna chi hrang hrang a thlen .
2. Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh khualzin hip kawngah ruahmanna engemaw zat siam mek a ni.
3. Operation Sindhu hnuaiah nimin khan mi 311 te chu thlawhtheihna hmangin Iran atangin New Delhi hruai thlen an ni.
4. United States-in tun hnaia Iran nuclear siamna hmun a bomb a thlak nual avangin Asia khawthlang lam ram a thlawhna thlawh dan a buai hle.

<><><>

11 YEARS OF PM MODI’S GOVT. (TOURISM)

Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh khualzin hip kawngah ruahmanna engemaw zat siam mek a ni.

Tourism director Pi R. Lalrodingi’n Akashvani Aizawl a hrihl danin Prime Minister Narendra Modi kaihhruai NDA sorkar hian Swadesh Darshan 2.0 hnuaiah Champhai a Keilungliah tuikhuah cheina atan leh Champhai district-ah tho Heritage & Cultural Centre dinna atan cheng vaibelchhe 80 chuang a rawn pe a. Hei hi tangkai taka hman tura ruahman a ni. Central sorkar chuan hman lai pi leh pute huna lung a milem ziah tam tak awmna Vangchhia khua a Kawtchhuah ropui mi tam takin an flawh thin chu a flawhtute tana remchang leh awlsamna tur (public amenities) siamna atan cheng vaibelchhe 5 leh nuai 2 a rawn pe bawk niin Pi R. Lalrodingi chuan a sawi bawk a ni.

Tourism director chuan MLA 40-te chu an bial chhunga khaw 1 theuh enkawl bik tur thlang (adopt) tura tih an nih thu a sawi a. ZPM sorkar flagship programme ‘Bana-kaih’ sum hmangin he’ng khuate hi chei tur a nih thu a sawi a. An khaw thlante mamawh ang hi Tourism department chuan a zir chiang mek zel a, an zir chianna behchhanin ruahmanna an siam dawn niin a sawi a ni.

<><><>

RAILWAY

Kilometre 51 leh metre 38 a thui Bairabi leh Sairang inkar rel kawng chu Prime Minister Pu Narendra Modi-a'n a hawn rin a ni.

Northeast Frontier Railway (NRF) hotute chuan he lai rel kawng hi siam zawh tep a nih tawh thu leh a remchang chuan Prime Minister-in a hawn ngei an rin thu an sawi a. Mahse, Ministry of Railways atanga thu chiang a awm hma chuan an la sawi fak theih rih lo niin an sawi. Puan tawh angin Commissioner of Railway Safety (CRS) Northeast Frontier Circle Pu Sumeet Singhal chuan June ni 6 leh ni 10 inkar chhung khan Hortoki leh Sairang rel chawlhmun inkara rel kawng a him tawk leh him tawk loh hi uluk takin a endik a. A him tawkah a ngai ni a thudawn a nih lai-in a report thehluhna Ministry of Railways in a pawm leh pawm loh hriat a la ni lova, an puan thuai beisei a ni. Pu Singhal hian nikum July thla khan Bairabi leh Sairang inkar rel kawng him leh him loh a endik tawh a, a him tawk ti a report a pek chu Ministry of Railways chuan nikum vek August thla bul lam khan a lo pawm tawh a ni.

Cheng vaibelchhe 5,021 leh nuai 45 ruahmanna hmanga hnathawh Bairabi leh Sairang inkar rel kawng lian hnathawhna atan hian sum za zela 97 hman a ni tawh a, a taka thawh chin hi za zela 94 point 5 a ni tawh bawk a. Ministry lam pawhin hna hi thawh zawh tep a nih thu leh chak taka thawh chhunzawm zel a nih thu an sawi a. July thla chhung hi chuan hawn theiha zawh fel vek hman an beisei a ni.



COVID

Ram chhung hmun dangah leh hmar chhak state thenkhatah Covid-19 kai a tam chhoh viau tawh lai-in Mizoramah chuan kuminah 2 chauh hri kai chhinchhiah an la awm.

Thenawm Manipur state-ah January thla atanga nimin thlenga Covid hri kai 98 an tlin tawh lai-in Mizoramah chuan kuminah 2 chauh kai thar an la awm a. He'ng mi 2-te hi Aizawl district a cheng an ni a, Zoram Medical College & Hospital-a enkawl an nih hnu-ah June ni 5 khan dam takin damdawi-in an chhuahsan leh tawh a ni. Heti chung hian Integrated Disease Surveillance Programme (IDSP) hnathawkte chuan Covid dinhmun hi chik taka an ngaihven reng thu leh central sorkara Ministry of Health & Family Welfare thuneitute nen an inbiak pawh reng thu an sawi a. A tul dan a zira Mizoram pawn atanga lo lutte lo endik pawh kalpui thei turin ruahmanna siam turin an inpeh reng niin an sawi a ni.

Kum 2020 bul lam atanga Covid hri a len tan atanga tun thleng hian Covid hri kai a rinhlelh sample nuai 19, sing 9, sang 7 leh 619 endik a ni tawh a. Endik zinga mi nuai 2, sing 3 sang 9 leh 637 te chuan Covid an kai tih hmuhchhuah a ni a. An zinga mi 734 te chuan Covid hri hi an thihpui a, mi nuai 2, sing 3, sang 9 leh 903 te erawh chu enkawl dam an ni thung.



CHAMPHAI RAIN HAVOC

Nimin nileng leh nizan thlenga Champhai khawpuia ruahsur nasa tak chuan chhiatna chi hrang hrang a thlen a,

Champhai District Disaster Management Authority hotute hnen atanga thu dawn danin, Champhai district Hospital main Road chu Vengsang huam chhung ah leiminin a hnawh pinga, lirthei eng chi mah a kal thei lova, District hospital kawng dang atanga hel a ngai a. Kawng chhak lama mimal chenna In chu min chhe thei dinhmuna a din avangin kawngpui thlang lama mite venthawn thilah nizan khan hmun dangah an riakchhuak hlawm.

Champhai atanga Aizawl panna, National highway no.06 chu Champhai atanga KM 5 vel, Chhungte khaw hnuiaia leimin nasa takin lirthei kaltlang theih lohvin a hnawh ping mek a, tun hma kawng hlui Champhai atanga Chhungte patlanga Tuipui khaw lama Aizawl panna kawng ping chu tukin hian thenfai hman beisei a ni

Champhai Project, Vengsang, New Saron veng, College veng leh Kanan Veng ah te pawh leimin tenau vangin inkalpawhna kawng a ping a, Kanan vengah Champhai to Aizawl panna kawngpui chu leimin vangin a ping mek baw a, Electric ban tlu avangin veng thekhkatin power supply an dawng thei lo.

Champhai Electric vengah Pu Thangruma In chu nimin ruahsurah khan tuihawkin hawrhin a in lungrem a chim a, a in hi la tlusawp chiah lo deuhin an bungrua zawng zawng ruahsur karah nimin tlai khan mi tlawmngai ten an thiar chhuah sak vek a ni.

Champhai Bethel Veng chhungah hmun li vel, kawng hrang hrangah leimin vangin kawng a pin bakah Bethel Lane hnuai Pu Gozakama in dinhmun hlauhawmah a awm. A kawmthlang chhungkaw hnih chu an riakchhuak. Champhai Circuit House ram pawh a min nual. Pick up motor pakhat leimin in a chhilh chu an hnuhchhuahna lamah a chhiat phah.

Hetihlai hian Champhai leilet zawlah tui a lian nasain Tuipui lui chu a kuang liam nasa a, Champhai zawl hmun zau takah tui lian mekin buh phun sa leh buh phunna tur ram a chim pil mek baw a.

<><><>

BSI CHIEF TRANSLATOR DIED

Bible Society of India Chief Translator leh Executive member Rev. Dr. H. Vanlalauva, chu nizan khan Ebenezer damdawi in, Aizawl-ah a thi a, vawiinah vui a ni ang.

Rev. Dr. H. Vanlalauva hi a pension hma in Aizawl Theological College Principal leh Synod Moderator a ni tawh a, kum kum 1986 ah ordain a ni. Kum 1981 a BD a zawh atangin ATC ah a thawk a, a Pro Pastor chhung zawng pawh hian a thawk zui a, 1987 atangin hun pumin ATC Lecturer hna a thawk a ni. Kum 1990-1995 thleng khan Banglaore ah Doctorate zirin a awm a, 1995 ah Doctorate Degree neiin, 1999 atanga 2007 thleng ATC Principal a ni a, kum 2008 ah Synod Moderator niin a pension zui ta a ni.

A pension rual hian Serampore hnuaia Doctorate zirna SATHRI Director niin kum 2014 thleng a thawk zui leh a, 2014 atang hian ATC ah Adjunct Professor hna a thawk zui leh bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

OPERATION SINDHU

Sorkar laipuiin India khua leh tui Iran rama tangkhang mekte a thiarchhuahna beihpui Operation Sindhu hnuaiah nimin khan mi 311 te chu thlawhtheihna hmangin Iran atangin New Delhi hruai thlen an ni.

Ministry of External Affairs thuchhuakin a tarlan danin Iran atang hian India khua leh tui mi 1428-te chu him dam takin India ram hruai thlen an ni tawh a, Iran khawpui Tehran-a India embassy pawh tunlai hian a lun hle a, embassy hian India khua leh tui Iran-a tangkhangte chu tuamhlawmin theihtawp an chhuah mek a ni.

<><><>

US AIRSTRIKE AT IRAN DISRUPTED FLIGHT :

United States-in tun hnaia Iran nuclear siamna hmun a bomb a thlak nual avangin Asia khawthlang lam ram a thlawhna thlawh dan a buai hle.

Thlawhna thlawh kual dan enna, Flight Tracking Service hnuaia Flight Radar 24 atanga a lan danin, khualzin phur thlawhna Asia khawthlang lam ram paltlang thinte chuan an sahimna zawngin tun hnai hian Iran, Iraq, Syria leh Israel ramte chu an thlawh hel nasa hle a, hei hian Caspian Sea bakah Egypt leh Saudi Arabia-te chu ti lun hle in a hma ai a zinkawng thui zawk an zawh thin avang hian thlawhna in tuialhthei a hman nasat bakah a chuan man pawh a to sawt hle.

US beihna avang hian Iran parliament chuan Persian Gulf atanga lawng hmanga khawvel hmun tam zawka tuialhthei sem chhuahna kawng kilometer 33 a thui, Strait of Hormuz chu khar a rawt a, Iran Foreign Minister Abbas Agrachi pawhin nimin khan chanchinbu mite hmaa thu a sawina-ah vawiin lam hian Russia rama a thlawh luh tur thu leh President Vladamir Putin-a a hmuh tur thu a sawi bawk.

<><><>